

VENDIM
Nr.7, datë 4.1.2012
PËR PËRCAKTIMIN E PROCEDURAVE DHE TË DOKUMENTACIONIT TË NEVOJSHËM
PËR ARKËTIMIN E TAKSËS SË RENTËS MINERARE
I NDRYSHUAR

Në mbështetje të nenit 100 të Kushtetutës, të pikës 4 të nenit 4 të ligjit nr.9975, date 28.7.2008 “Për taksat kombëtare”, të ndryshuar, me propozimin e Ministrit të Financave, Këshilli i Ministrave

VENDOSI:

1. Çdo person fizik apo juridik, që është i licencuar dhe/ose vepron në industrinë minerare, sipas një marrëdhënieje kontraktuale me ministrin përgjegjës për ekonominë, paguan taksën e rentës minerare për mineralet që nxjerr nga mbitoka dhe nëntoka e territorit të Republikës së Shqipërisë dhe nënproduktet e prodhuara nga këto minerale prej tij.

2. Renta minerare llogaritet si detyrim mujor i subjektit taksapagues, zotërues i lejes së shfrytëzimit, në çastin kur ai shet apo eksporton mineralin apo nënproduktin e prodhuar. Në rastin e eksportit të produkteve minerare, arkëtimi i rentës bëhet nga degët e doganave në rrethe, ndërsa në rastin e shitjes së produkteve minerare për konsum final brenda vendit, arkëtimi i rentës bëhet nga drejtoritë rajonale tatimore, ku është regjistruar subjekti shfrytëzues i llojit të mineralit.

3. Kur subjekti zotërues i lejes së shfrytëzimit shet për konsum final, brenda vendit, mineralin apo nënproduktin e prodhuar, renta minerare paguhet pranë organit tatimor brenda dates 15 të muajit pasardhës. Vlera që merret parasysh për aplikimin e rentës apo baza e taksueshme, mbi të cilën zbatohet renta, është vlera e deklaruar në faturën e shitjes së mineralit, në rastin e shitjes së mineraleve. Për përcaktimin e detyrimit të rentës, si dokument bazë shërben fatura tatimore me TVSH. Detyrimi për rentën, në rastin kur shitet mineral, përcaktohet duke shumëzuar përqindjen e rentës, sipas shtojcës nr. 2 të ligjit nr. 9975, datë 28.7.2008 “Për taksat kombëtare”, të ndryshuar, me vlerën totale të shitjeve. Në rastin e shitjes së produkteve/nënprodukteve që kanë përdorur lëndë të parë pasuri minerale vendase, në bazën e llogaritjes së rentës minerare përfshihet vetëm vlera e mineralit/mineraleve të përdorur për prodhimin e produktit/nënproduktit. Vlera deklarohet nga subjekti, ndërsa autoriteti tatimor ka të drejtë ta krahasojë këtë vlerë të deklaruar me vlerën referuese, sipas normativave teknologjike të produkteve që përdorin si lëndë të parë minerale.

Në varësi të përqindjes së mineralit të shitur brenda vendit, nga nxjerrësi i mineralit të përpunuesi/pasuruesi i mineralit, llogaritja e pagesës së rentës bëhet sipas çmimeve, të përcaktuara në tabelat referuese, të miratuara nga komisioni *ad-hoc*, i përcaktuar në këtë vendim.

(Ndryshuar me VKM nr. 123, datë 11.02.2015. Botuar në FI.Z. nr.22, datë 20 shkurt 2015.)

4. Kur subjekti zotërues i lejes së shfrytëzimit eksporton mineral, renta minerare paguhet në degët doganore, në çastin e bërjes së deklaratës doganore të eksportit, nga zotëruesi i lejes së shfrytëzimit, i cili është njëkohësisht dhe eksportues i produktit mineral që eksportohet. Vlera që merret parasysh për aplikimin e rentës apo baza e taksueshme, mbi të cilën aplikohet renta minerare, është vlera e faturës së shitjes së mineraleve, në bazë të çmimeve të eksportit, që është çmimi FOB në Shqipëri. Për përcaktimin e detyrimit të rentës, në këtë rast, si dokument bazë shërben fatura tatimore e shitjes me TVSH zero. Në rastin e eksportit të

produkteve/nënprodukteve që kanë përdorur lëndë të parë pasuri minerale vendase, në bazën e llogaritjes së rentës minerare përfshihet vetëm vlera e mineralit/mineraleve të përdorur/a për prodhimin e produktit/nënproduktit. Vlera deklarohet nga subjekti eksportues, ndërsa autoriteti doganor ka të drejtë ta krahasojë këtë vlerë të deklaruar me vlerën referuese, sipas normativave teknologjike të produkteve që përdorin si lëndë të parë minerale.

5. Nëse subjekti zotërues i lejes së shfrytëzimit eksporton mineralin e nxjerrë nga miniera apo nënproduktin e prodhuar nëpërmjet një subjekti tjetër të vetëm eksportues, renta, në këtë rast, paguhet si nga zotëruesi i lejes së shfrytëzimit, ashtu edhe nga eksportuesi. Renta, për produktin e shitur (mineral apo nënprodukt), paguhet nga zotëruesi i lejes së shfrytëzimit pranë drejtorisë rajonale tatimore ku subjekti është i regjistruar, duke u llogaritur në përputhje me pikën 3 të këtij vendimi, ndërsa nga eksportuesi, pranë organit doganor, në çastin e eksportimit të mineralit apo nënproduktit të blerë nga zotëruesi i lejes së shfrytëzimit. Eksportuesi paguan rentën minerare në doganë, për diferencën midis vlerës së rentës së përlllogaritur në bazë të vlerës së faturës së shitjes së mineralit apo nënproduktit të tij, në bazë të çmimeve të eksportit, që është çmimi FOB në Shqipëri, dhe vlerës së rentës së paguar brenda vendit, në përputhje me pikën 3 të këtij vendimi. Për përcaktimin e detyrimit të rentës, në këtë rast, si dokument bazë shërbejnë fatura tatimore e shitjes me TVSH zero dhe kopja e faturës së blerjes brenda vendit, së bashku me dokumentin që provon pagimin e rentës minerare për të gjithë sasinë e faturuar. Nëse eksportuesi nuk disponon faturën e blerjes brenda vendit së bashku me dokumentin e pagesës së rentës minerare, ai paguan pranë degës doganore rentën minerare për të gjithë sasinë e faturuar në faturën tatimore të shitjes me TVSH zero.”

6. Kur organet doganore apo tatimore konstatojnë shmangie të dukshme të vlerës së mineralit, të deklaruar nga subjekti, me vlerën e tregut, ato do t'i referohen vlerës së tregut për llogaritjen e rentës minerare. Organeve tatimore dhe doganore, në mungesë të dokumentacionit përkatës që vërteton çmimet e shitjes, u lind e drejta e përdorimit të metodave alternative të vlerësimit, në përputhje me ligjin nr.9920, datë 19.5.2008 “Për procedurat tatimore në Republikën e Shqipërisë” dhe me ligjin nr.8449, datë 27.1.1999 “Kodi Doganor i Republikës së Shqipërisë”.

7. Vlera e tregut për kategoritë e mineraleve përcaktohet në bazë të të dhënave, nga burime të tilla si: çmimet e tregjeve ndërkombëtare, të dhënat statistikore të Agjencisë Kombëtare të Burimeve Natyrore dhe Drejtorisë së Përgjithshme të Doganave, investigimi i tregut, brenda dhe jashtë vendit, i kryer nga Drejtoria e Përgjithshme e Doganave dhe Agjencia Kombëtare e Burimeve Natyrore, çmimet e produkteve minerare të ngjashme, që eksportohen, çmimet e paraqitura në deklaratën e eksportit për subjektet e tjera që veprojnë në të njëjtën industri.

7/1. Lista me vlerat referuese, sipas normativave teknologjike të produkteve që përdorin minerale, hartohet dhe miratohet nga një komision *ad-hoc* i ngritur me urdhër të Ministrit të Financave. Komisioni, i përbërë nga përfaqësues të Ministrisë së Financave, drejtorive të përgjithshme të doganave e tatimeve, Ministrisë së Ekonomisë, Tregtisë dhe Energjetikës (Agjencia Kombëtare e Burimeve Natyrore) dhe Fakultetit të Gjeologji-Minierave, brenda 2 (dy) muajve nga hyrja në fuqi e këtij vendimi, ua përcjell zyrtarisht listën e miratuar autoriteteve doganore e tatimore, për t'u përdorur si burim i të dhënave të disponueshme. Ky komision mbledhet dhe përditëson listën sa herë është e nevojshme.

8. Drejtoritë rajonale tatimore dhe degët doganore, të cilat janë agjentë tatimorë, brenda datës 30 të çdo muaji, dërgojnë informacion analitik në Ministrinë e Financave për vlerën e rentës minerare të mbledhur, për subjektin tatimor dhe njësitë e qeverisjes vendore ku kryhet aktiviteti. Mënyra e ndarjes së të ardhurave të rentës ndërmjet pushtetit qendror dhe atij vendor kryhet sipas nenit 15 të ligjit nr.10 487, datë 5.12.2011 “Për buxhetin e vitit 2012” dhe të udhëzimit të Ministrit të Financave.

9. Ngarkohen Ministria e Financave, Drejtoria e Përgjithshme e Doganave dhe ajo e Tatimeve, Ministria e Ekonomisë, Tregtisë dhe Energjetikës (Agjencia Kombëtare e Burimeve Natyrore), Fakulteti i Gjeologji-Minierave dhe njësitë e qeverisjes vendore për zbatimin e këtij vendimi.

10. Vendimi nr.1203, datë 27.8.2008 “Për përcaktimin e vlerës së saktë, në përqindje, të rentës së pasurisë minerare, sipas vlerës së tregut, për çdo mineral apo grup mineralesh”, I ndryshuar, shfuqizohet.

Ky vendim hyn në fuqi më 1 janar 2012 dhe botohet në Fletoren Zyrtare.

[Ky vendim hyn në fuqi pas botimit në Fletoren Zyrtare.](#)

[Ky vendim hyn në fuqi pas botimit në Fletoren Zyrtare](#)

KRYEMINISTRI
Sali Berisha

[Ky vendim hyn në fuqi pas botimit në Fletoren Zyrtare.](#)

KRYEMINISTRI
Edi Rama

Botuar në Fletoren Zyrtare Nr.1. datë 19.01.2012.

[Ndryshuar me VKM. Nr. 201, datë 21.03.2012. Botuar në Fletoren Zyrtare Nr. 35, datë 17.04.2012.](#)

[Ndryshuar me VKM. Nr. 512, datë 13.06.2013.. Botuar në Fletoren Zyrtare Nr.106, datë 8.korrik 2013.](#)

[Ndryshuar me VKM Nr. 123, datë 11.02.2015. Botuar në Fl.Z. nr.22, datë 20 shkurt 2015.\).](#)